



Wakil media menonton Anwar menyampaikan ucapan pembukaan di skrin besar di Pusat Media Antarabangsa ketika Sidang Kemuncak ASEAN-GCC-China di Pusat Konvensyen Kuala Lumpur, semalam. (Foto BERNAMA)

ASEAN-GCC mampu bangkit jadi tunjang ekonomi masa depan

BERITA HARIAN 28 MAY 2025

m/s 2

Hubungan kukuh kunci pertingkat kerjasama jamin kesejahteraan

Kuala Lumpur: Datuk Seri Anwar Ibrahim menegaskan ASEAN bersama Majlis Kerjasama Teluk (GCC) mempunyai keupayaan untuk bangkit sebagai tunjang pemangkin pertumbuhan masa depan.

Perdana Menteri berkata, ini mengambil kira status ASEAN sebagai rantau yang paling aman dan berkembang pesat dari segi ekonomi serta dinamik, sementara GCC melaksanakan anjakan paradigma, daripada budaya padang pasir yang kelam kepada wilayah yang kini dinamik, penuh potensi dan maju dari segi ekonomi, dengan penguasaan teknologi terkini.

“Hubungan ASEAN-GCC yang lebih kukuh akan menjadi kunci bagi mempertingkat kerjasama di antara rantau, membina ketahanan dan menjamin kemakmuran mampan untuk rakyat kedua-dua rantau.

“Saya percaya kerjasama ASEAN-GCC tidak pernah menjadi lebih penting berbanding hari ini, ketika kita menghadapi landskap global yang semakin kompleks akibat ketidakstabilan ekonomi dan cabaran geopolitik,” katanya. Beliau berkata demikian keti-



ka menyampaikan ucapan pembukaan pada Sidang Kemuncak ASEAN-GCC Kedua di sini, semalam sempena Sidang Kemuncak ASEAN Ke-46.

Rangka Kerja Kerjasama ASEAN-GCC 2024-2028, yang diterima pakai pada Sidang Kemuncak ASEAN-GCC pertama di Riyadh, dua tahun lalu, menyediakan pelan tindakan untuk memperkukuh lagi kerjasama dalam tiga tonggak utama yang digariskan.

Selesai isu Palestin

Sementara itu Anwar berkata, ASEAN berkongsi komitmen sama dengan GCC dalam merangka resolusi penyelesaian serta proses damai yang muktamad terhadap isu Palestin, khususnya di Semenanjung Gaza.

Perdana Menteri yang juga Pengerusi ASEAN mengulangi ge- saannya agar gencatan senjata

serta merta dilaksana di Gaza, di samping pengiktirafan bagi penyelesaian dua negara sebagai jalan bagi mengakhiri konflik puluhan tahun itu.

Anwar berkata, konflik di Gaza serta Palestin begitu memberi kesan dan memedihkan hati seluruh masyarakat di rantau ini.

“Saya dibesarkan untuk menentang penjajahan dalam apa jua bentuk dan oleh itu menolak penjajahan oleh mana-mana negara (khususnya Israel). Kami membesar untuk menghormati maruah dan aspirasi semua orang,” katanya.

Anwar mengulas ucapan pembukaan disampaikan Putera Mahkota Kuwait yang juga Pengerusi GCC, Sheikh Sabah Khalid Al-Hamad Al-Sabah pada sidang itu, yang antara lain menyentuh komitmen negara teluk itu dalam menyokong perjuangan dan aspirasi rakyat Palestin untuk menubuhkan sebuah negara merdeka berdasarkan sempadan 4 Jun 1967, iaitu Baitulmaqdis Timur sebagai ibu kotanya.

Terdahulu dalam ucapan itu, Sheikh Sabah menyeru masyarakat antarabangsa bangkit dengan memberikan tekanan berterusan terhadap rejim Israel supaya menghentikan pencerohnya serta memastikan perlindungan ke atas orang awam khususnya di Gaza.

“Kami juga memperbaharui seruan kami untuk menyambung semula proses damai yang serius dan boleh dipercayai berdasarkan resolusi antarabangsa dan Inisiatif Keamanan Arab,” katanya.